

春秋經傳比事

春秋經傳比事卷十六

閩 林春溥 鑑塘

昭公二

五年

甲子春王正月舍中軍

穀梁曰貴復正也

五年春王正月舍中軍卑公室也毀中軍于施氏成諸臧氏初作中軍三分公室而各有其一季氏盡征之叔孫氏臣其子弟孟氏取其半焉及其舍之也四分公室季氏擇二二子各一皆盡征之而貢于公以書使杜洩告於殯曰子固欲毀中軍既毀之矣故告杜洩曰夫子唯不欲毀也故盟諸僂闕詛諸五父之衢受其書而投之帥士而哭之叔仲子謂季孫曰帶受命於子叔孫曰葬鮮者自西門季孫命杜洩杜洩曰卿喪自朝魯禮也

吾子爲國政未改禮而又遷之羣臣懼死不敢自也既葬而行仲至自齊季孫欲立之南遺曰叔孫氏厚則季氏薄彼實家亂子勿與知不亦可乎南遺使國人助豎牛以攻諸大庫之庭司官射之中目而死豎牛取東鄙三十邑以與南遺昭子卽位朝其家衆曰豎牛禍叔孫氏使亂大從殺適立庶又披其邑將以赦罪罪莫大焉必速殺之豎牛懼奔齊孟仲之子殺諸塞闕之外投其首於寧風之棘上仲尼曰叔孫昭子之不勞不可能也周任有言曰爲政者不賞私勞不罰私怨詩云有覺德行四國順之初穆子之生也莊叔以周易筮之遇明夷三三之謙三三以示卜楚丘曰是將行而歸爲子祀以讒人入其名曰牛卒以餒死明夷日也日之數十故有

十時亦當十位自王已下其二爲公其三爲卿以上其中食日爲二旦日爲三明夷之謙明而未融其當旦乎故曰爲子祀日之謙當鳥故曰明夷于飛明而未融故曰垂其翼象日之動故曰君子于行當三在旦故曰三日不食離火也艮山也離爲火火焚山山敗於人爲言敗言爲讒故曰有攸往主人有言言必讒也純離爲牛世亂讒勝勝將適離故曰其名曰牛謙不足飛不翔垂不峻翼不廣故曰其爲子後乎吾子亞卿也抑少不終楚殺其大夫屈申

楚子以屈申爲貳於吳乃殺之以屈生爲莫敖使與令尹子蕩如晉逆女過鄭鄭伯勞子蕩于汜勞屈生于菟氏晉侯送女于邢丘子產相鄭伯會晉侯于邢丘

公如晉

公如晉自郊勞至于贈賄無失禮晉侯謂女叔齊曰魯侯不亦善於禮乎對曰魯侯焉知禮公曰何爲自郊勞至于贈賄禮無違者何故不知對曰是儀也不可謂禮禮所以守其國行其政令無失其民者也今政令在家不能取也有子家羈弗能用也好大國之盟陵虐小國利人之難不知其私公室四分民食於他思莫在公不圖其終爲國君難將及身不恤其所禮之本末將於此乎在而屑屑焉習儀以亟言善於禮不亦遠乎君子謂叔侯於是乎知禮

○晉韓宣子如楚送女叔向爲介鄭子皮子大叔勞諸索氏大叔謂叔向曰楚王汰侈已甚子其戒之叔向曰汰

侈已甚身之災也焉能及人若奉吾幣帛慎吾威儀守之以信行之以禮敬始而思終終無不復從而失儀敬而不失威道之以訓辭奉之以舊法考之以先王度之以二國雖汰侈若我何及楚楚子朝其大夫曰晉吾仇敵也苟得志焉無恤其他今其來者上卿上大夫也若吾以韓起爲閹以羊舌肸爲司宮足以辱晉吾亦得志矣可乎大夫莫對蘧啓疆曰可苟有其備何故不可恥匹夫不可以無備況恥國乎是以聖王務行禮不求恥人朝聘有珪享頰有璋小有述職大有巡功設机而不倚爵盈而不飲宴有好貨煢有陪鼎入有郊勞出有贈賄禮之至也國家之敗失之道也則禍亂興城濮之役晉無楚備以敗於邲邲之役楚無晉備以敗於鄢自

鄙以來晉不失備而加之以禮重之以睦是以楚弗能報而求親焉既獲姻親又欲恥之以召寇讎備之若何誰其重此若有其人恥之可也若其未有君亦圖之晉之事君臣曰可矣求諸侯而麀至求昏而薦女君親送之上卿及上大夫致之猶欲恥之君其亦有備矣不然奈何韓起之下趙成中行吳魏舒范鞅知盈羊舌肸之下祁午張趯籍談女齊梁丙張骼輔燮苗賁皇皆諸侯之選也韓襄爲公族大夫韓須受命而使矣箕襄邢帶叔禽叔椒子羽皆人家也韓賦七邑皆成縣也羊舌四族皆彊家也晉人若喪韓起楊肸五卿八大夫輔韓須楊石囚其十家九縣長轂九百其餘四十縣遺守四千奮其武怒以報其大恥伯華謀之中行伯魏舒帥之其

蔑不濟矣君將以親易怨實無禮以速寇而未有其備使羣臣往遺之禽以逞君心何不可之有王曰不穀之過也大夫無辱厚爲韓子禮王欲敖叔向以其所不知而不能亦厚其禮韓起反鄭伯勞諸圍辭不敢見禮也○鄭罕虎如齊娶於子尾氏晏子驟見之陳桓子問其故對曰能用善人民之主也

夏莒牟夷以牟婁及防茲來奔

穀梁曰以者不以者也及防茲以大及小也莒無大

夫以其地來何以書重地也

夏莒牟夷以牟婁及防茲來奔牟夷非卿而書尊地也

秋七月公至自晉

莒人愬于晉晉侯欲止公范獻子曰不可人朝而執之誘也討不以師而誘以成之惰也爲盟主而犯此二者



無乃不可乎請歸之閒而以帥討焉乃歸公秋七月公

至自晉

戊辰叔弓帥師敗莒師于蚡泉

蚡公羊作潰  
穀梁作賁

莒人來討不設備戊辰叔弓敗諸蚡泉莒未陳也

秦伯卒

公羊曰何以不  
名秦者夷也

冬楚子蔡侯陳侯許男頓子沈子徐人越人伐吳

冬十月楚子以諸侯及東夷伐吳以報棘櫟麻之役薳

射以繁揚之師會於夏汭越大夫常壽過帥師會楚子

于瑣聞吳師出薳啓疆帥師從之遽不設備吳人敗諸

鵠岸楚子以駟至於羅汭吳子使其弟蹶由犒師楚人

執之將以釁鼓王使問焉曰女卜來吉乎對曰吉寡君

聞君將治兵於敝邑卜之以守龜曰余亟使人犒師請

行以觀王怒之疾徐而爲之備尙克知之龜兆告吉曰  
克可知也君若驩焉好逆使臣滋傲邑休息而忘其死  
亡無日矣今君舍焉震電馮怒虐執使臣將以鼙鼓則  
吳知所備矣傲邑雖羸若早脩完其可以息師難易有  
備可謂吉矣且吳社稷是卜豈爲一人使臣獲擊軍鼓  
而傲邑知備以禦不虞其爲吉孰大焉國之守龜其何  
事不卜一臧一否其誰能常之城濮之兆其報在邨今  
此行也其庸有報志乃弗殺楚師濟於羅汭沈尹赤會  
楚子次於萊山遠射帥繁揚之師先入南懷楚師從之  
及汝清吳不可入楚子遂觀兵於坻箕之山是行也吳  
早設備楚無功而還以蹶由歸楚子懼吳使沈尹射待  
命于巢薏啓疆待命于雩婁禮也

○秦后子復歸於秦景公卒故也

六年

乙丑○秦  
貞公元年

春王正月杞伯益姑卒

六年春王正月杞文公卒弔如同盟禮也

葬秦景公

大夫如秦葬景公禮也

○三月鄭人鑄刑書叔向使詰子產書曰始吾有虞於子今則已矣昔先王議事以制不爲刑辟懼民之有爭心也猶不可禁禦是故閑之以義糾之以政行之以禮守之以信奉之以仁制爲祿位以勸其從嚴斷刑罰以威其淫懼其未也故誨之以忠聳之以行教之以務使之以和臨之以敬涖之以彊斷之以剛猶求聖哲之上明察之官忠信之長慈惠之師民於是乎可任使也而不

生禍亂民知有辟則不忌於上並有爭心以徵於書而  
微幸以成之弗可爲矣夏有亂政而作禹刑商有亂政  
而作湯刑周有亂政而作九刑三辟之興皆叔世也今  
吾子相鄭國作封洫立謗政制參辟鑄刑書將以靖民  
不亦難乎詩曰儀式刑文王之德曰靖四方又曰儀刑  
文王萬邦作孚如是何辟之有民知爭端矣將棄禮而  
徵於書錐刀之末將盡爭之亂獄滋豐賄賂並行終子  
之世鄭其敗乎胥聞之國將亡必多制其此之謂乎復  
書曰若吾子之言僑不才不能及子孫吾以救世也既  
不承命敢忘大惠士文伯曰火見鄭其火乎火未出而  
作火以鑄刑器藏爭辟焉火如象之不火何爲

夏季孫宿如晉

夏季孫宿如晉拜莒田也晉侯享之有加籛武子退使行人告曰小國之事大國也苟免於討不敢求貺得貺不過三獻今豆有加下臣弗堪無乃戾也韓宣子曰寡君以爲驩也對曰寡君猶未敢況下臣君之隸也敢聞加貺固請徹加而後卒事晉人以爲知禮重其好貨

葬杞文公

宋華合比出奔衛

宋寺人柳有寵大子佐惡之華合比曰我殺之柳聞之乃坎用牲埋書而告公曰合比將納亡人之族既盟于北郭矣公使視之有焉遂逐華合比合比奔衛於是華亥欲代右師乃與寺人柳比從爲之徵曰聞之久矣公使代之見於左師左師曰女夫也必亡女喪而宗室於

人何有人亦於女何有詩曰宗子維城毋俾城壞毋獨斯畏女其畏哉

○六月丙戌鄭戾○楚公子棄疾如晉報韓子也過鄭鄭罕虎公孫僞游吉從鄭伯以勞諸祖辭不敢見固請見之見如見王以其乘馬八匹私面見子皮如上卿以馬六匹見子產以馬四匹見子大叔以馬二匹禁芻牧採樵不入山不樵樹不采蕪不抽屋不強匄誓曰有犯命者君子廢小人降舍不爲暴主不恩賓往來如是鄭三卿皆知其將爲王也韓宣子之適楚也楚人弗逆公子棄疾及晉晉侯將亦弗逆叔向曰楚辟我衷若何效辟詩曰爾之教矣民胥效矣從我而已焉用效人之辟誓曰聖作則無寧以善人爲則而則人之辟乎匹夫爲

善民猶則之況國君乎晉侯說乃逆之

秋九月大雩

秋九月大雩旱也

楚薳罷帥師伐吳

公羊作薳願

徐儀楚聘于楚楚子執之逃歸懼其叛也使薳洩伐徐吳人救之令尹子蕩帥師伐吳師于豫章而次于乾谿吳人敗其師于房鍾獲宮廄尹棄疾子蕩歸罪於薳洩而殺之

冬叔弓如楚

冬叔弓如楚聘且弔敗也

齊侯伐北燕

十一月齊侯如晉請伐北燕也士匄相士鞅逆諸河禮

也晉侯許之十二月齊侯遂伐北燕將納簡公晏子曰  
不入燕有君矣民不貳吾君賄左右諂作大事不以  
信未嘗可也

七年

丙寅○杞平公郁釐元年

春王正月暨齊平

穀梁曰暨者不得已也以外及內曰暨

七年春王正月暨齊平齊求之也癸巳齊侯次于號燕  
人行成曰敝邑知罪敢不聽命先君之敝器請以謝罪  
公孫皙曰受服而退侯豐而動可也二月戊午盟于濡  
上燕人歸燕姬賂以瑤瓊玉櫝聳耳不克而還

○楚子之爲令尹也爲王旌以田芋尹無宇斷之曰一國  
兩君其誰堪之及卽位爲章華之宮納亡人以實之無  
宇之闖入焉無宇執之有司弗與曰執人於王宮其罪  
大矣執而謁諸王王將飲酒無宇辭曰天子經略諸侯



正封古之制也封略之內何非君土食土之毛誰非君臣故詩曰普天之下莫非王土率土之濱莫非王臣天有十日人有十等下所以事上上所以共神也故王臣公公臣大夫大夫臣士士臣阜阜臣興興臣隸隸臣僚僚臣僕僕臣臺馬有圉牛有牧以待百事今有司曰女胡執人於王宮將焉執之周文王之法曰有亡荒閱所以得天下也吾先君文王作僕區之法曰盜所隱器與盜同罪所以封汝也若從有司是無所執逃臣也逃而舍之是無陪臺也王事無乃闕乎昔武王數紂之罪以告諸侯曰紂爲天下逋逃主萃淵藪故夫致死焉君王始求諸侯而則紂無乃不可乎若以二文之法取之盜有所在矣王曰取而臣以往盜有寵未可得也遂赦之

三月公如楚

楚子成章華之臺

國語云開闢臺有臺

願與諸侯落之大

寧遠啓疆曰臣能得魯侯遠啓疆來召公辭曰昔先君

成公命我先大夫嬰齊曰吾不忘先君之好將使衡父

照臨楚國鎮撫其社稷以輯寧爾民嬰齊受命于蜀奉

承以來弗敢失隕而致諸宗祧曰我先君共王引領北

望日月以冀傳序相授於今四王矣嘉惠未至唯襄公

之辱臨我喪孤與其二三臣悼心失圖社稷之不皇況

能懷思君德今君若步玉趾辱見寡君寵靈楚國以信

蜀之役致君之嘉惠是寡君既受貺矣何蜀之敢望其

先君鬼神實嘉賴之豈唯寡君君若不來使臣請問行

期寡君將承質幣而見于蜀以請先君之貺公將往夢

襄公祖梓慎曰君不果行襄公之適楚也夢周公祖而行今襄公實祖君其不行子服惠伯曰行先君未嘗適楚故周公祖以道之襄公適楚矣而祖以道君不行何之三月公如楚鄭伯勞于師之梁孟僖子爲介不能相儀及楚不能答郊勞

叔孫婁

公羊作舍下同

如齊涖盟

穀梁曰涖位也內之前定之辭謂之來謂之涖外之前定之辭謂之來

夏四月甲辰朔日有食之

夏四月甲辰朔日有食之晉侯問於士文伯曰誰將當日食對曰魯衛惡之衛大魯小公曰何故對曰去衛地如魯地於是有災魯實受之其大咎其衛君乎魯將上卿公曰詩所謂彼日而食于何不臧者何也對曰不善政之謂也國無政不用善則自取謫于日月之災故政

不可不慎也務三而已一曰擇人二曰因民三曰從時  
○晉人來治杞田季孫將以成與之謝息爲孟孫守不可  
曰人有言曰雖有挈餅之知守不假器禮也夫子從君  
而守臣喪邑雖吾子亦有猜焉季孫曰君之在楚於晉  
罪也又不聽晉魯罪重矣晉師必至吾無以待之不如  
與之間晉而取諸杞吾與子桃成反誰敢有之是得二  
成也魯無憂而孟孫益邑子何病焉辭以無山與之萊  
柞乃遷于桃晉人爲杞取成○楚子享公于新臺使長  
鬣者相好以大屈旣而悔之薳啓疆聞之見公公語之  
拜賀公曰何賀對曰齊與晉越欲此久矣寡君無適與  
也而傳諸君君其備禦三鄰慎守寶矣敢不賀乎公懼  
乃反之

國語曰靈王爲章華之臺與伍舉升焉曰臺美夫對曰臣聞國君服寵以爲美安民以爲樂聽

德以為聰致遠以為明不聞其以土木之崇高彫鏤為  
 美而以金石匏竹之昌大器庶為樂不聞其以觀大視  
 侈淫色以為明而以察清濁為聰也先君莊王為鞠居  
 之臺高不過望國氛大不過容宴豆木不妨守備用不  
 煩官府民不廢時務官不易朝常問誰宴焉則宋公鄭  
 伯問誰相禮則華元駟騶問誰贊事則陳侯蔡侯許男  
 頓子其大夫侍之先君是以除亂克敵而無惡於諸侯  
 今君為此臺也國民罷焉財用盡焉年穀敗焉百官煩  
 焉舉國留之數年乃成願得諸侯與始升焉諸侯皆距  
 無有至者而後使太宰啓彊請於魯侯懼之以蜀之役  
 而僅得以來使富都那豎贊焉而使長鬣之士相焉臣  
 不知其美也夫美也者上下內外小大遠邇皆無害焉  
 故曰美若於目觀則美縮於財用則價是聚民利以自  
 封而瘠民也胡美之為夫君國者將民之與處民實瘠  
 矣君安得肥且夫私欲宏弛則德義鮮少德義不行則  
 邇者騷離而遠者距遠天子之貴也唯其以公侯為官  
 正而以伯子男為師旅其有美名也唯其施令德於遠  
 近而小大安之也若敏民利以成其私欲使民蒿焉忘  
 其安樂而有遠心其為惡也甚矣安用日勸故先王之  
 為臺榭也榭不過講軍實臺不過望氛祥故榭度於大  
 卒之居臺度於臨觀之高其所不奪穡地其為不置財  
 用其事不煩官業其日不廢時務解饒之地於是乎為  
 之城守之未於是乎用之官寮之暇於是乎臨之國時  
 之隙於是乎成之故周詩曰經始靈臺經之營之庶民

政之不日成之者始勿亟庶民子來王在靈囿靈囿後  
休夫爲幸爾將以教民利也不知其以賈之也君若謂  
此事美而爲之○鄭子產聘于晉晉侯有疾韓宣子逆  
正其始分

客私焉曰寡君寢疾於今三月矣並走羣望有加而無  
瘳今夢黃熊入於寢門其何厲鬼也對曰以君之明子  
爲大政其何厲之有昔堯殛鯀于羽山其神化爲黃熊  
以入于羽淵實爲夏郊三代祀之晉爲盟主其或者未  
之祀也乎韓子祀夏郊晉侯有閒賜子產莒之四方鼎  
子產爲豐施歸州田於韓宣子曰曰君以夫公孫段爲  
能任其事而賜之州田今無祿早世不獲久享君德其  
子弗敢有不敢以聞於君私致諸子宣子辭子產曰古  
人有言曰其父析薪其子弗克負荷施將懼不能任其  
先人之祿其況能任大國之賜縱吾子爲政而可後之

人若屬有疆場之言敝邑獲戾而豐氏受其大討吾子取州是免敝邑於戾而建置豐氏也敢以爲請宣子受之以告晉侯晉侯以與宣子宣子爲初言病有之以易原縣於樂大心○鄭人相驚以伯有曰伯有至矣則皆走不知所往鑄刑書之歲二月或夢伯有介而行曰壬子余將殺帶也明年壬寅余又將殺段也及壬子駟帶卒國人益懼齊燕平之月壬寅公孫段卒國人愈懼其明月子產立公孫洩及良止以撫之乃止子大叔問其故子產曰鬼有所歸乃不爲厲吾爲之歸也大叔曰公孫洩何爲子產曰說也爲身無義而圖說從政有所反之以取媚也不媚不信不信民不從也及子產適晉趙景子問焉曰伯有猶能爲鬼乎子產曰能人生始化曰

魄既生魄陽曰魂用物精多則魂魄強是以有精爽至於神明匹夫匹婦強死其魂魄猶能馮依於人以爲淫厲況良霄我先君穆公之胄子良之孫子耳之子敝邑之卿從政三世矣鄆雖無腆抑諺曰蕞爾國而三世執其政柄其用物也弘矣其取精也多矣其族又大所馮厚矣而強死能爲鬼不亦宜乎○子皮之族飲酒無度故馬師氏弔與子皮氏有惡齊師還自燕之月罕朔殺罕騶罕朔奔晉韓宣子問其位於子產子產曰君之羈臣苟得容以逃死何位之敢擇卿違從大夫之位罪人以其罪降古之制也朔於敝邑亞大夫也其官馬師也獲戾而逃唯執政所寘之得免其死爲惠大矣又敢求位宣子爲子產之敏也使從嬖大夫



秋八月戊辰衛侯惡卒

秋八月衛襄公卒晉大夫言於范獻子曰衛事晉爲睦  
晉不禮焉庇其賊人而取其地故諸侯貳詩曰鷓鴣在  
原兄弟急難又曰死喪之威兄弟孔懷兄弟之不睦於  
是乎不用況遠人誰敢歸之今又不禮於衛之嗣衛必  
叛我是絕諸侯也獻子以告韓宣子宣子說使獻子如  
衛弔且反賊田衛齊惡告喪于周且請命王使成簡公  
如衛弔且追命襄公曰叔父陟恪在我先王之左右以  
佐事上帝余敢忘高圍亞圍

九月公至自楚

九月公至自楚孟僖子病不能相禮乃講學之苟能禮  
者從之及其將死也召其大夫曰禮人之幹也無禮無

以立者開將有達者曰孔丘聖人之後也而滅於宋其  
祖弗父何以有宋而授厲公及正考父佐戴武宣三命  
茲益其故其鼎銘云一命而餽再命而僮三命而俯循  
牖而走亦莫余敢侮餽於是鬻於是以餽余口其其也  
如是臧孫紇有言曰聖人有明德者若不當世其後必  
有達人今其將在孔丘乎我若獲沒必屬說與何忌於  
夫子使事之而學禮焉以定其位故孟懿子何忌與南宮  
敬叔說師事仲尼仲尼曰能補過者君子也詩曰君子  
是則是效孟僖子可則效也已

○單獻公乘親用羈冬十月辛酉襄頃之族殺獻公而立  
成公

冬十有一月癸未季孫宿卒

禮檀弓曰季武子寢疾蟻固  
不說齊衰而入見及其喪也

曾點倚其門而歌

十一月季武子卒晉侯謂伯瑕曰吾所問日食從矣可常乎對曰不可六物不同民心不壹事序不類官職不則同始異終胡可常也詩曰或燕燕居息或惓惓事國其異終也如是公曰何謂六物對曰歲時日月星辰是謂也公曰多語寡人辰而莫同何謂辰對曰日月之會是謂辰故以配日

十有二月癸亥葬衛襄公

衛襄公夫人姜氏無子嬖人嬖始生孟縶孔成子夢康叔謂己立元余使羈之孫圉與史苟相之史朝亦夢康叔謂己余將命而子苟與孔烝錡之曾孫圉相元史朝見成子告之夢夢協晉韓宣子爲政聘于諸侯之歲媯

始生子名之曰元孟繫之足不良弱行孔成子以周易筮之曰元尚享衛國主其社稷遇屯☵☵又曰余尚立繫尚克嘉之遇屯☵☵之比☵☵以示史朝史朝曰元亨又何疑焉成子曰非長之謂乎對曰康叔名之可謂長矣孟非人也將不列於宗不可謂長且其繇曰利建侯嗣吉何建建非嗣也二卦皆云子其建之康叔命之二卦告之筮襲於夢武王所用也弗從何爲弱足者居侯主社稷臨祭祀奉民人事鬼神從會朝又焉得居各以所利不亦可乎故孔成子立靈公十二月癸亥葬衛襄公

八年

丁卯○衛襄公元年

○八年春石言于晉魏榆晉侯問於師曠曰石何故言對

曰石不能言或馮焉不然民聽濫也抑臣又聞之曰作  
事不時怨讟動于民則有非言之物而言今宮室崇侈  
民力彫盡怨讟並作莫保其性石言不亦宜乎於是晉  
侯方築虜祁之宮叔向曰子野之言君子哉君子之言  
信而有徵故怨遠於其身小人之言僭而無徵故怨咎  
及之詩曰哀哉不能言匪舌是出唯躬是瘁笥矣能言  
巧言如流俾躬處休其是之謂乎是宮也成諸侯必叛  
君必有咎夫子知之矣

春陳侯之弟招殺陳世子偃師

穀梁曰邲曰陳公子招今曰陳侯之弟招向曰盡其

親所以惡招也世子云者唯君之戚也親而殺之惡也

陳哀公元妃鄭姬生悼大子偃師二妃生公子留下妃  
生公子勝二妃嬖留有寵屬諸司徒招與公子過哀公

有廢功三月甲申公子招公子過殺悼太子偃師而立  
公子留

夏四月辛丑陳侯溺卒

殺梁無侯字

夏四月辛亥哀公縊

叔弓如晉

叔弓如晉賀虢祁也游吉相鄭伯以如晉亦賀虢祁也  
史趙見子大叔曰甚哉其相蒙也可弔也而又賀之子  
大叔曰若何弔也其非唯我賀將天下實賀

楚人執陳行人于徵師殺之陳公子留出奔鄭

于徵師赴于楚且告有立君公子勝愬之于楚楚人執  
而殺之公子留奔鄭書曰陳侯之弟招殺陳世子偃師  
罪在招也楚人執陳行人于徵師殺之罪不在行人也

傳在叔弓如晉之前

秋蒐于紅

梁曰正也因蒐狩以習用武事禮之大者也

流旁握御擊者不得入車軌塵馬候蹄揜禽旅御者不夫其馳然後射者能中過防弗逐不從奔之道也面傷不獻不成禽不獻禽雖多天子取三十焉其餘與士衆以習射於射宮射而中田不得禽則得禽田得禽而射不中則不得禽是以知古之貴仁義而賤勇力也

秋大蒐于紅自根牟至于商衛革車千乘

○七月甲戌齊子尾卒子旗欲治其室丁丑殺梁嬰八月

庚戌逐子成子工子車皆來奔而立子良氏子尾之宰

其臣曰孺子長矣而相吾室欲兼我也授甲將攻之陳

桓子善於子尾亦授甲將助之或告子旗子旗不信則

數人告將往又數人告於道遂如陳氏桓子將出矣聞

之而還游服而逆之請命對曰聞彊氏授甲將攻子子

聞諸曰弗聞子盍亦授甲無字請從子旗曰子胡然彼孺子也吾誨之猶懼其不濟吾又寵秩之其若先人何子盍謂之周書曰惠不惠茂不茂康叔所以服弘大也桓子稽顙曰頃靈福子吾猶有望遂和之如初

陳人殺其大夫公子過

陳公子招歸罪於公子過而殺之

大雩

冬十月壬午楚師滅陳執陳公子招放之于越殺陳孔奭

公羊作孔瑗○穀梁曰惡楚子也

九月楚公子棄疾帥師奉孫吳圍陳宋戴惡會之冬十一月壬午滅陳輿嬖袁克殺馬毀玉以葬楚人將殺之請寘之既又請私私於幄加絰於賴而逃使穿封戌爲



陳公曰城麋之役不諂侍飲酒於王王曰城麋之役女知寡人之及此女其辟寡人乎對曰若知君之及此臣必致死禮以息楚晉侯問於史趙曰陳其遂亡乎對曰未也公曰何故對曰陳顛頊之族也歲在鶉火是以卒滅陳將如之今在析木之津猶將復由且陳氏得政于齊而後陳卒亡自幕至于瞽瞍無違命舜重之以明德寘德於遂遂世守之及胡公不淫故周賜之姓使祀虞帝臣聞盛德必百世祀虞之世數未也繼守將在齊其兆既存矣

葬陳哀公

穀梁曰不與楚滅閔公也

九年

戊辰

春叔弓會楚子于陳

九年春叔弓宋華亥鄭游吉衛趙厲會楚子于陳

許遷于夷

二月庚申楚公子棄疾遷許于夷實城父取州來淮北之田以益之伍舉授許男田然丹遷城父人於陳以夷濮西田益之遷方城外入於許

○周甘人與晉閻嘉爭閻田晉梁丙張趯率陰戎伐潁王使詹桓伯辭於晉曰我自夏以后稷魏駘芮岐畢吾西土也及武王克商蒲姑商奄吾東土也巴濮楚鄧吾南土也肅慎燕亳吾北土也吾何邇封之有文武成康之建母弟以蕃屏周亦其廢隊是爲豈如弁髦而因以倣之先王居櫛杙于四裔以禦魘魅故允姓之姦居于瓜州伯父惠公歸自秦而誘以來使偪我諸姬入我郊甸則戎焉取之戎有中國誰之咎也后稷封殖天下今戎

制之不亦難乎伯父圖之我在伯父猶衣服之有冠冕  
木水之有本原人民之有謀主也伯父若裂冠毀冕拔  
本塞原專棄謀主雖戎狄其何有余一人叔向謂宣子  
曰文之伯也豈能改物翼戴天子而加之以其自文以  
來世有衰德而暴滅宗周以宣示其侈諸侯之貳不亦  
宜乎且王辭直子其圖之宣子說王有姻喪使趙成如  
周弔且致閭田與祿反潁俘王亦使賓滑執甘大夫襄  
以說於晉晉人禮而歸之

夏四月陳災

災公穀並作火○公羊曰陳已滅矣其言陳火何存陳也

夏四月陳災鄭裨竈曰五年陳將復封封五十二年而  
遂亡子產問其故對曰陳水屬也火水妃也而楚所相  
也今火出而火陳逐楚而建陳也妃以五成故曰五年

歲五及訖火而後陳卒亡楚克有之天之道也故曰五十二年

○晉荀盈如齊逆女還六月卒于戲陽殯于絳未葬晉侯飲酒樂膳宰屠蒯趨入請佐君使尊許之而遂酌以飲工曰女爲君耳將司聰也辰在子卯謂之疾日君徹宴樂學人舍業爲疾故也君之卿佐是謂股肱股肱或虧何痛如之女弗聞而樂是不聰也又飲外嬖嬖叔曰女爲君目將司明也服以旌禮禮以行事事有其物物有其容今君之容非其物也而女不見是不明也亦自飲也曰味以行氣氣以實志志以定言言以出令臣實司味二御失官而君弗命臣之罪也公說徹酒初公欲廢知氏而立其外嬖爲是悛而止秋八月使荀躒佐下軍

以說焉

秋仲孫矍如齊

孟僖子如齊殷聘禮也

冬築郎囿

冬築郎囿書時也季平子欲其速成也叔孫昭子曰詩曰經始勿亟庶民子來焉用速成其以勦民也無囿猶可無民其可乎

十年記春王正月

○十年春王正月有星出于婺女鄭裨竈言於子產曰七月戊子晉君將死今茲歲在顓頊之虛姜氏任氏實守其地居其維首而有妖星焉告邑姜也邑姜晉之妣也天以七紀戊子逢公以登星斯於是乎出吾是以譏之

附錄史記年表  
四月日蝕

見齊樂施來奔

齊患樂高氏皆者酒信內多怨彊於陳鮑氏而惡之夏有告陳桓子曰子旗子良將攻陳鮑亦告鮑氏桓子授甲而如鮑氏遭子良醉而騁遂見文子則亦授甲矣使視二子則皆將飲酒桓子曰彼雖不信聞我授甲則必逐我及其飲酒也先伐諸陳鮑方睦遂伐樂高氏子良曰先得公陳鮑焉往遂伐虎門晏平仲端委立于虎門之外四族召之無所往其徒曰助陳鮑乎曰何善焉助樂高乎曰庸愈乎然則歸乎曰君伐焉歸公召之而後入公卜使王黑以靈姑鉞率吉請斷三尺焉而用之五月庚辰戰于稷樂高敗又敗諸莊國人追之又敗諸

門樂施高彊來奔陳鮑分其室晏子謂桓子必致諸公讓德之主也讓之謂懿德凡有血氣皆有爭心故利不可強思義爲愈義利之本也蒞利生孽姑使無蒞乎可以滋長桓子盡致諸公而請老于莒桓子召子山私具握幕器用從者之衣屨而反棘焉子商亦如之而反其邑子周亦如之而與之夫于反子城子公公孫捷而皆益其祿凡公子公孫之無祿者私分之邑國之貧約孤寡者私與之粟曰詩云陳錫載周能施也桓公是以霸公與桓子莒之旁邑辭穆孟姬爲之請高唐陳氏始大

秋

七月季孫意如

公羊作隱如下同

叔弓仲孫獲帥師伐莒

秋七月平子伐莒取鄆獻俘始用人於亳社臧武仲在齊聞之曰周公其不饗魯祭乎周公饗義魯無義詩曰

德音孔昭視民不佻佻之謂甚矣而壹用之將誰福哉  
戊子晉侯彪卒

戊子晉平公卒鄭伯如晉及河晉人辭之游吉遂如晉  
九月叔孫婍如晉葬晉平公

九月叔孫婍齊國弱宋華定衛北宮喜鄭罕虎許人曹  
人莒人邾人滕人薛人杞人小邾人如晉葬平公也鄭  
子皮將以幣行子產曰喪焉用幣用幣必百兩百兩必  
千人千人至將不行不行必盡用之幾千人而國不亡  
子皮固請以行既葬諸侯之大夫欲因見新君叔孫昭  
子曰非禮也弗聽叔向辭之曰大夫之事畢矣而又命  
孤孤斬焉在衰經之中其以嘉服見則喪禮未畢其以  
喪服見是重受弔也大夫將若之何皆無辭以見子皮



盡用其幣歸謂子羽曰非知之實難將在行之夫子知之矣我則不足書曰欲敗度縱敗禮我之謂矣夫子知度與禮矣我實縱欲而不能自克也昭子至自晉大夫皆見高彊見而退昭子語諸大夫曰爲人子不可不慎也哉昔慶封亡子尾多受邑而稍致諸君君以爲忠而甚寵之將死疾于公宮輦而歸君親推之其子不能任是以此忠爲令德其子弗能任罪猶及之難不慎也喪夫人之力棄德曠宗以及其身不亦害乎詩曰不自我先不自我後其是之謂乎

十有二月甲子宋公成卒

成公羊作戊

冬十二月宋平公卒初元公惡寺人柳欲殺之及喪柳熾炭于位將至則去之比葬又有寵

十有一年

庚午○晉昭公庚元  
年○宋元公佐元年

春王二月叔弓如宋葬宋

不公

十一年春王二月叔弓如宋葬平公也

夏四月丁巳楚子虔誘蔡侯般殺之于申

公羊曰楚子虔何以名絕此討

賊也曷爲絕之懷惡而討不義君子不予也穀梁曰何爲名之也夷狄之君誘中國之君而殺之故謹而名之也稱時稱月稱日稱地謹之也

景王問於萇弘曰今茲諸侯何實吉何實凶對曰蔡凶

此蔡侯般弑其君之歲也歲在豕韋弗過此矣楚將有之然壘也歲及大梁蔡復楚凶天之道也楚子在申召蔡靈侯靈侯將往蔡大夫曰王貪而無信唯蔡於感今幣重而言甘誘我也不如無往蔡侯不可三月丙申楚子伏甲而饗蔡侯於申醉而執之夏四月丁巳殺之刑

其士七十人

楚公子棄疾帥師圍蔡

公子棄疾帥師圍蔡韓宣子問於叔向曰楚其克乎對曰克哉蔡侯獲罪於其君而不能其民天將假手於楚以斃之何故不克然胥聞之不信以幸不可再也楚王奉孫吳以討於陳曰將定而國陳人聽命而遂縣之今又誘蔡而殺其君以圍其國雖幸而克必受其咎弗能久矣桀克有緡以喪其國紂克東夷而隕其身楚小位下而亟暴於二王能無咎乎天之假助不善非祚之也厚其凶惡而降之罰也且譬之如天其有五材而將用之力盡而傲之是以無拯不可沒振

五月甲申夫人歸氏薨

五月齊歸薨

大蒐于比蒲

大蒐于比蒲非禮也

仲孫貜會邾子盟于祲祥

公羊作侵羊

孟僖子會邾莊公盟于祲祥脩好禮也泉丘人有女夢以其帷幕孟氏之廟遂奔僖子其僚從之盟于清丘之社曰有子無相棄也僖子使助蘧氏之箴反自祲祥宿于蘧氏生懿子及南宮敬叔於泉丘人其僚無子使字

敬叔

秋季孫意如會晉韓起齊國弱宋華亥衛北宮佗鄭罕虎

曹人杞人于厥憇

公羊作屈銀

楚師在蔡晉荀吳謂韓宣子曰不能救陳又不能救蔡

春秋以事省未  
三  
物以無親晉之不能亦可知也已爲盟主而不恤亡國  
將焉用之秋會于厥憇謀救蔡也鄭子皮將行子產曰  
行不遠不能救蔡也蔡小而不順楚大而不德天將棄  
蔡以壅楚盈而罰之蔡必亡矣且喪君而能守者鮮矣  
三年王其有咎乎美惡周必復王惡周矣晉人使狐父  
請蔡于楚弗許

○單子會韓宣子于戚視下言徐叔向曰單子其將死乎  
朝有著定會有表衣有禕帶有結會朝之言必聞于表  
著之位所以昭事序也視不過結禕之中所以道容貌  
也言以命之容貌以明之失則有闕今單子爲王官伯  
而命事於會視不登帶言不進步貌不道容而言不昭  
矣不道不其不昭不從無守氣矣

九月己亥葬我小君齊歸

九月葬齊歸公不感晉士之送葬者歸以語史趙史趙曰必爲魯郊侍者曰何故曰歸姓也不思親祖不歸也叔向曰魯公室其卑乎君有大喪國不廢蒐有三年之喪而無一日之感國不恤喪不忌君也君無感容不顧親也國不忌君君不顧親能無卑乎殆其失國

冬十有一月丁酉楚師滅蔡執蔡世子有穀梁作友以歸用之

穀梁曰此子也其曰世子何也不與楚殺也一事註乎志所以惡楚子也

冬十一月楚子滅蔡用隱大子于岡山申無宇曰不祥五牲不相爲用況用諸侯乎王必悔之

○十二月單成公卒○楚子城陳蔡不羹使棄疾爲蔡公王問於申無宇曰棄疾在蔡何如對曰擇子莫如父擇

臣莫如君鄭莊公城櫟而寘子元焉使昭公不立齊桓  
公城穀而寘管仲焉至于今賴之臣聞五大不在遠五  
細不在庭親不在外羈不在內今棄疾在外鄭丹在內  
君其少戒王曰國有大城何如對曰鄭京櫟實殺曼伯  
宋蕭亳實殺子游齊渠丘實殺無知衛蒲戚實出獻公  
若由是觀之則害於國末大必折尾大不掉君所知也

附錄

竹書河水赤  
于龍門三里

春秋經傳比事卷十七

閩 林春溥 鑑塘

昭公三

十有二年

辛未

春齊高偃帥師納北燕伯于陽

梁曰維者內不受也燕

伯之不名何不以高偃挈燕伯也

十二年春齊高偃納北燕伯款于唐因其衆也

三月壬申鄭伯嘉卒

三月鄭簡公卒將爲葬除及游氏之廟將毀焉子大叔使其除徒執用以立而無庸毀曰子產過女而問何故不毀乃曰不忍廟也諾將毀矣旣如是子產乃使辟之司墓之室有當道者毀之則朝而墉弗毀則日中而墉子大叔請毀之曰無若諸侯之賓何子產曰諸侯之賓



能來會吾喪豈憚日中無損於賓而民不害何故不爲  
遂弗毀日中而葬君子謂子產於是乎知禮禮無毀人  
以自成也

夏宋公使華定來聘

夏宋華定來聘通嗣君也公享之爲賦蓼蕭弗知又不  
答賦昭子曰必亡宴語之不懷寵光之不宣令德之不  
知同福之不受將何以在

○齊侯衛侯鄭伯如晉朝嗣君也

公如晉至河乃復

穀梁曰季孫氏不使淫乎晉也

公如晉至河乃復取郟之役莒人愬于晉晉有平公之  
喪未之治也故辭公公子慙遂如晉

○晉侯享諸侯子產相鄭伯辭於享請免喪而後聽命晉

人許之禮也晉侯以齊侯宴中行穆子相投壺晉侯先  
穆子曰有酒如淮有肉如坻寡君中此爲諸侯師中之  
齊侯舉矢曰有酒如澠有肉如陵寡人中此與君代興  
亦中之伯瑕謂穆子曰子失辭吾固師諸侯矣壺何爲  
焉其以中僞也齊君弱吾君歸弗來矣穆子曰吾軍帥  
彊禦卒乘競勸今猶古也齊將何事公孫僂趨進曰日  
盱君勤可以出矣以齊侯出

五月葬鄭簡公

傳在楚殺成虎之後

五月葬鄭簡公

楚殺其大夫成熊

公羊作成然殺梁作成虎

楚子謂成虎若敖之餘也遂殺之或譖成虎於楚子成  
虎知之而不能行書曰楚殺其大夫成虎懷寵也

秋七月

○晉荀吳僞會齊師者假道於鮮虞遂入昔陽秋八月壬午滅肥以肥子絲臯歸○周原伯綏虐其輿臣使曹逃冬十月壬申朔原輿人逐綏而立公子跪尋綏奔郊甘簡公無子立其弟過過將去成景之族成景之族賂劉獻公丙申殺甘悼公過即而立成公之孫鮪丁酉殺獻大子之傅庾皮之子過殺瑕辛于市及宮嬖綽王孫沒劉州鳩陰忌老陽子

冬十月公子愁出奔齊

愁公羊作整

季平子立而不禮于南蒯南蒯謂子仲公子吾出季氏而歸其室於公子更其位我以費爲公臣子仲許之南蒯語叔仲穆子叔仲且告之故季悼子之卒也叔孫昭

子以再命爲卿及平子伐莒克之更受三命叔仲子欲  
構二家謂平子曰三命踰父兄非禮也平子曰然故使  
昭子昭子曰叔孫氏有家禍殺適立庶故姑也及此若  
因禍以斃之則聞命矣若不廢君命則固有著矣昭子  
朝而命吏曰媾將與季氏訟書辭無頗季孫懼而歸罪  
於叔仲子故叔仲小南蒯公子慙謀季氏慙告公而遂  
從公如晉南蒯懼不克以費叛如齊子仲還及衛閔亂  
逃介而先及郊聞費叛遂奔齊南蒯之將叛也其鄉人  
或知之過之而歎且言曰恤恤乎湫乎攸乎深恩而淺  
謀邇身而遠志家臣而君圖有人矣哉南蒯枚筮之遇  
坤☷☷之比☷☷☷曰黃裳元吉以爲大吉也示子服惠  
伯曰卽欲有事何如惠伯曰吾嘗學此矣忠信之事則

可不然必敗外疆內溫忠也和以率貞信也故曰黃裳元吉黃中之色也裳下之飾也元善之長也中不忠不得其色下不其不得其飾事不善不得其極外內倡和爲忠率事以信爲其供養三德爲善非此三者弗當且夫易不可以占險將何事也且可飾乎中美能黃上美爲元下美則裳參成可筮猶有闕也筮雖吉未也將適費飲鄉人酒鄉人或歌之曰我有圃生之杞乎從我者子乎去我者鄙乎倍其鄰者恥乎已乎已乎非吾黨之士乎平子欲使昭子逐叔仲小小間之不敢朝昭子命吏謂小待政於朝曰吾不爲怨府

楚子伐徐

楚子狩于州來次于穎尾使蕩侯潘子司馬督蹇尹午

陵尹喜帥師圍徐以懼吳楚子次于乾谿以爲之援雨  
雪王皮冠秦復陶翠被豹舄執鞭以出僕析父從右尹  
子革父王見之去冠被舍鞭與之語曰昔我先王熊繹  
與呂伋王孫牟變父禽父並事康王四國皆有分我獨  
無有今吾使人於周求鼎以爲封王其與我乎對曰與  
君王哉昔我先王熊繹辟在荆山篳路藍縷以處草莽  
跋涉山林以事天子唯是桃弧棘矢以共禦王事齊王  
舅也晉及魯衛王母弟也楚是以無分而彼皆有今周  
與四國服事君王將唯命是從豈其愛鼎王曰昔我皇  
祖伯父昆吾舊許是宅今鄭人貪賴其田而不我與我  
若求之其與我乎對曰與君王哉周不愛鼎鄭敢愛田  
王曰昔諸侯遠我而畏晉今我大城陳蔡不羹賦皆千

乘子與有勞焉諸侯其畏我乎對曰畏君王哉是四國者專足畏也又加之以楚敢不畏君王哉工尹路請曰君王命劓圭以爲鉞秘敢請命王入視之析父謂子革吾子楚國之望也今與王言如響國其若之何子革曰摩厲以須王出吾刃將斬矣王出復語左史倚相趨過王曰是良史也子善視之是能讀三墳五典八索九丘對曰臣嘗問焉昔穆王欲肆其心周行天下將皆必有車轍馬跡焉祭公謀父作祈招之詩以止王心王是以獲沒於祗宮臣問其詩而不知也若問遠焉其焉能知之王曰子能乎對曰能其詩曰祈招之愔愔式昭德音思我王度式如玉式如金形民之力而無醉飽之心王揖而入饋不食寢不寐數日不能自克以及於難仲尼

曰古也有志克己復禮仁也信善哉楚靈王若能如是

豈其辱於乾谿

晉伐鮮虞

穀梁曰其曰晉狄之也不正其與夷狄交伐中國故狄稱之也

晉伐鮮虞因肥之役也

十有三年

壬申○蔡平公廬元年○鄭定公寧元年○陳惠公吳元年

春叔弓帥師圍

費

十三年春叔弓圍費弗克敗焉平子怒令見費人執之以爲囚俘冶區夫曰非也若見費人寒者衣之飢者食之爲之令主而其困乏費來如歸南氏亡矣民將叛之誰與居邑若憚之以威懼之以怒民疾而叛爲之聚也若諸侯皆然費人無歸不親南氏將焉入矣平子從之費人叛南氏



夏四月楚公子比自晉歸于楚弑其君虔于乾谿

楚子之爲令尹也殺大司馬薳掩而取其室及卽位奪薳居田遷許而質許圍蔡洧有寵於王王之滅蔡也其父死焉王使與於守而行申之會越大夫戮焉王奪鬬韋龜中犖又奪成然邑而使爲郊尹蔓成然故事蔡公故薳氏之族及薳居許圍蔡洧蔓成然皆王所不禮也因羣喪職之族啓越大夫常壽過作亂圍固城克息舟城而居之觀起之死也其子從在蔡事朝吳曰今不封蔡蔡不封矣我請試之以蔡公之命召子干子皙及郊而告之情強與之盟入襲蔡蔡公將食見之而逃觀從使子干食坎用牲加書而速行已徇於蔡曰蔡公召二子將納之與之盟而遣之矣將師而從之蔡人聚將執

之辭曰失賊成軍而殺余何益乃釋之朝吳曰二三子

若能死亡則如違之以待所濟若求安定則如與之以

濟所欲且違上何適而可衆曰與之乃奉蔡公召二子

而盟于郢依陳蔡人以國楚公子比干公子黑肱子公

子棄疾公蔡成然蔡朝吳帥陳蔡不羹許葉之師因四

族之徒以入楚及郊陳蔡欲爲名故請爲武軍蔡公知

之曰欲速且役病矣請藩而已乃藩爲軍蔡公使須務

牟與史痺先入因正僕人殺大子祿及公子罷敵公子

比爲王公子黑肱爲令尹次于魚陂公子棄疾爲司馬

先除王宮使觀從從師于乾谿而遂告之且曰先歸復

所後者剝師及訾梁而潰王聞羣公子之死也自投于

車下曰人之愛其子也亦如余乎侍者曰甚焉小人老

而無子知擠于溝壑矣王曰余殺人子多矣能無及此

乎右尹子革曰請待于郊以聽國人王曰衆怒不可犯

也曰若入於大都而乞師於諸侯王曰皆叛矣曰若亡

於諸侯以聽大國之圖君也王曰大福不再祇取辱焉

然丹子革乃歸于楚王公夏將欲入鄢芋尹無宇之子申

亥曰吾父再奸王命王弗誅惠孰大焉君不可忍惠不

可棄吾其從王乃求王遇諸棘闈以歸國語曰三軍叛

獨行屏營傍徨於山林之中三日乃見其涓人疇王呼

之曰余不食三日矣疇趨而進王枕其股以寢於地王

麻疇枕王以埃而去之王覺而無見也乃劓夏五月癸

劓將入棘闈棘闈不納乃入芋尹申亥氏焉夏五月癸

亥王縊于芋尹申亥氏申亥以其二女殉而葬之

楚公子棄疾殺公子比殺公羊

觀從謂子干曰不殺棄疾雖得國猶受禍也子干曰余

不忍也子玉

從觀

曰人將忍子吾不忍俟也乃行國每夜

駭曰王入矣乙卯夜棄疾使周走而呼曰王至矣國人

大驚使蔓成然走告子于子皙曰王至矣國人殺君司

馬將來矣君若早自圖也可以無辱衆怒如水火焉不

可爲謀又有呼而走至者曰衆至矣二子皆自殺丙辰

棄疾卽位名曰熊居葬子于于訾實訾敖殺囚衣之王

服而流諸漢乃取而葬之以靖國人使子旗蔓成爲令

尹楚師還自徐吳人敗諸豫章獲其五帥平王封陳蔡

復遷邑致羣賂施舍寬民宥罪舉職召觀從王曰唯爾

所欲對曰臣之先佐開卜乃使爲卜尹使枝如子躬聘

于鄭且致犂櫟之田事畢弗致鄭人請曰聞諸道路將

命寡君以犂櫟敢請命對曰臣未聞命旣復王問犂櫟

命寡君以犂櫟敢請命對曰臣未聞命旣復王問犂櫟

命寡君以犂櫟敢請命對曰臣未聞命旣復王問犂櫟

降服而對曰臣過失命未之致也王執其手曰子毋勤  
姑歸不穀有事其告子也他年芋尹申亥以王柩告乃  
改葬之初靈王卜曰余尙得天下不吉投龜詎天而呼  
曰是區區者而不余畀余必自取之民患王之無厭也  
故從亂如歸初其王無冢適有寵子五人無適立焉乃  
大有事于羣望而祈曰請神擇於五人者使主社稷乃  
徧以璧見於羣望曰當璧而拜者神所立也誰敢違之  
既乃與巴姬密埋璧於大室之庭使五人齊而長入拜  
康王跖之靈王肘加焉子干子皙皆遠之平王弱抱而  
入再拜皆厭紐鬪韋龜屬成然焉且曰棄禮違命楚其  
危哉子干歸韓宣子問於叔向曰子干其濟乎對曰難  
宣子曰同惡相求如市賈焉何難對曰無與同好誰與

同惡取國有五難有寵而無人一也有人而無主二也  
有主而無謀三也有謀而無民四也有民而無德五也  
子干在晉十三年矣晉楚之從不聞達者可謂無人族  
盡親叛可謂無主無釁而動可謂無謀爲羈終世可謂  
無民亡無愛微可謂無德王虐而不息楚君子干涉五  
難以弑舊君誰能濟之有楚國者其棄疾乎君陳蔡城  
外屬焉苛慝不作盜賊伏隱私欲不違臣無怨心先神  
命之國民信之萃姓有亂必季實立楚之常也獲神一  
也有民二也令德三也寵貴四也居常五也有五利以  
去五難誰能害之子干之官則右尹也數其貴寵則庶  
子也以神所命則又遠之其貴亡矣其寵棄矣民無懷  
焉國無與焉將何以立宣子曰齊桓晉文不亦是乎對

曰齊桓衛姬之子也有寵於僖有鮑叔牙賓須無隰朋以爲輔佐有莒衛以爲外主有國高以爲內主從善如流下善齊肅不藏賄不從欲施舍不倦求善不厭是以有國不亦宜乎我先君文公狐季姬之子也有寵於獻好學而不貳生十七年有士五人有先大夫子餘子犯以爲腹心有魏犢賈佗以爲股肱有齊宋秦楚以爲外主有欒卻狐先以爲內主亡十九年守志彌篤惠懷棄民民從而與之獻無異親民無異望天方相晉將何以代文此二君者異於子干其有寵子國有奧主無施於民無援於外去晉而不送歸楚而不逆何以冀國

秋公會劉子晉侯齊侯宋公衛侯鄭伯莒子邾子滕子薛伯杞伯小邾子于平丘

晉成虎祁諸侯朝而歸者皆有貳心爲取郟故晉將以諸侯來討叔向曰諸侯不可以不示威乃並徵會告于吳秋晉侯會吳子于良水道不可吳子辭乃還七月丙寅治兵于邾南甲車四千乘羊舌肸攝司馬遂合諸侯于平丘子產子大叔相鄭伯以會子產以幄幕九張行子大叔以四十旣而悔之每舍損焉及會亦如之次于衛地叔鮒求貨於衛淫芻蕘者衛人使屠伯饋叔向羹與一篋錦曰諸侯事晉未敢攜貳況衛在君之宇下而敢有異志芻蕘者異於他日敢請之叔向受羹反錦曰晉有羊舌肸者瀆貨無厭亦將及矣爲此役也子若以君命賜之其已客從之未退而禁之

八月甲戌同盟于平丘



晉人將尋盟齊人不可晉侯使叔向告劉獻公曰抑齊人不盟若之何對曰盟以底信君苟有信諸侯不貳何患焉告之以文辭董之以武師雖齊不許君庸多矣天子之老請帥王賦元戎十乘以先啓行遲速唯君叔向告于齊曰諸侯求盟已在此矣今君弗利寡君以爲請對曰諸侯討貳則有尋盟若皆用命何盟之尋叔向曰國家之敗有事而無業事則不經有業而無禮經則不序有禮而無威序則不共有威而不昭共則不明不明乘其百事不終所由傾覆也是故明王之制使諸侯歲聘以志業間朝以講禮再朝而會以示威再會而盟以顯昭明志業於好講禮於等示威於衆昭明於神自古以來未之或失也存亡之道恆由是興晉禮主盟懼有

不治奉承齊犧而布諸君求終事也君曰余必廢之何  
齊之有唯君圖之寡君聞命矣齊人懼對曰小國言之  
大國制之敢不聽從既聞命矣敬共以往遲速唯君叔  
向曰諸侯有聞矣不可以不示衆八月辛未治兵建而  
不旆壬申復旆之諸侯畏之邾人莒人愬于晉曰魯朝  
夕伐我幾亡矣我之不共魯故之以晉侯不見公使叔  
向來辭曰諸侯將以甲戌盟寡君知不得事君矣請君  
無勤子服惠伯對曰君信蠻夷之訴以絕兄弟之國棄  
周公之後亦唯君寡君聞命矣叔向曰寡君有甲車四  
千乘在雖以無道行之必可畏也況其率道其何敵之  
有牛雖瘠償於豚上其畏不死南蒯子仲之憂其庸可  
棄乎若奉晉之衆用諸侯之師因邾莒杞鄆之怒以討

魯罪聞其二憂何求而弗克魯人懼聽命甲戌同盟于平丘齊服也令諸侯日中造于除癸酉退朝子產命外僕速張於除子大叔止之使待明日及夕子產聞其未張也使速往乃無所張矣及盟子產爭承曰昔天子班貢輕重以列列尊貢重周之制也卑而貢重者甸服也鄭伯男也而使從公侯之貢懼弗給也敢以爲請諸侯靖兵好以爲事行理之命無月不至貢之無藝小國有闕所以得罪也諸侯脩盟存小國也貢獻無極亡可待也存亡之制將在今矣自日中以爭至于昏晉人許之旣盟子大叔咎之曰諸侯若討其可瀆乎子產曰晉政多門貳偷之不暇何暇討國不競亦陵何國之爲

公不與盟晉人執季孫意如以歸

公不與盟晉人執季孫意如以幕蒙之使然人守之司鐸射懷錦奉壺飲冰以蒲伏焉守者御之乃與之錦而入晉人以平子歸子服湫從

○子產歸未至聞子皮卒哭且曰吾已無爲爲善矣唯夫子知我仲尼謂子產於是行也足以爲國基矣詩曰樂旨君子邦家之基子產君子之求樂者也且曰合諸侯藝貢事禮也

公至自會

公羊曰公不見與盟大夫執何以致會不恥也曷爲不恥諸侯遂亂反陳蔡君子不恥不與焉

○鮮虞人聞晉師之悉起也而不警邊且不脩備晉荀吳自著雍以上軍侵鮮虞及中人驅衝競大獲而歸

蔡侯廬歸于蔡陳侯吳歸于陳

公羊曰此皆滅國也其言歸何不與諸侯專封也

楚之滅蔡也靈王遷許胡沈道房申於荆焉平王卽位

既封陳蔡而皆復之禮也隱大子之子廬歸于蔡禮也  
悼大子之子吳歸于陳禮也

冬十月葬蔡靈公

穀梁曰滅國不葬然且葬之不與楚滅且成諸侯之事也

冬十月葬蔡靈公禮也

公如晉至河乃復

公如晉荀吳謂韓宣子曰諸侯相朝講舊好也執其卿而朝其君有不好焉不如辭之乃使士景伯辭公于河

吳滅州來

吳滅州來合尹子旗請伐吳王弗許曰吾未撫民人未事鬼神未脩守備未定國家而用民力敗不可悔州來在吳猶在楚也子姑待之

○季孫猶在晉子服患伯私於中行穆子曰魯事晉何以

不如夷之小國魯兄弟也土地猶大所命能具若爲夷  
棄之使事齊楚其何瘳於晉親親與大賞其罰否所以  
爲盟主也子其圖之諺曰臣一主二吾豈無大國穆子  
告韓宣子且曰楚滅陳蔡不能救而爲夷執親將焉用  
之乃歸季孫患伯曰寡君未知其罪合諸侯而執其老  
若猶有罪死命司也若曰無罪而惠免之諸侯不聞是  
逃命也何免之爲請從君惠於會宣子忠之謂叔向曰  
子能歸季孫乎對曰不能鮒也能乃使叔魚叔魚見季  
孫曰昔鮒也得罪於晉君自歸於魯君微武子之賜不  
至於今雖獲歸骨於晉猶子則肉之敢不盡情歸子而  
不歸鮒也聞諸吏將爲子除館於西河其若之何且泣  
平子懼先歸患伯待禮

十有四年

癸酉○楚平王居元年

春意如至自晉

十四年春意如至自晉尊晉罪己也尊晉罪己禮也

○南蒯之將叛也盟費人司徒老祁慮癸僞廢疾使請於南蒯曰臣願受盟而疾興若以君靈不死請待閒而盟許之二子因民之欲叛也請朝衆而盟遂劫南蒯曰羣臣不忘其君畏子以及今三年聽命矣子若弗圖費人不忍其君將不能畏子矣子何所不逞欲請送子請期五日遂奔齊侍飲酒於景公公曰叛夫對曰臣欲張公室也子韓皙曰家臣而欲張公室罪莫大焉司徒老祁慮癸來歸費齊侯使鮑文子致之

三月曹伯滕卒

夏四月

○夏楚子使然丹簡上國之兵於宗丘且撫其民分貧振窮長孤幼養老疾收介特救災患宥孤寡赦罪戾詰姦慝舉淹滯禮新敘舊祿勲合親任良物官使屈罷簡東國之兵於召陵亦如之好於邊疆息民五年而後用師禮也

秋葬曹武公

八月莒子去疾卒

秋八月莒著丘公卒郊公不感國人弗順欲立著丘公之弟庚與蒲餘侯惡公子意恢而善於庚與郊公惡公子鐸而善於意恢公子鐸因蒲餘侯而與之謀曰爾殺意恢我出君而納庚與許之

○楚令尹子旗有德於王不知度與養氏比而求無厭王



患之九月甲午楚子殺鬬成然而滅養氏之族使鬬子

居郢以無忘舊勲

冬莒殺其公子意恢

穀梁曰莒無大夫而曰公子意恢意恢賢也

冬十二月蒲餘侯茲夫殺莒公子意恢郊公奔齊公子鐸逆庚與於齊齊隰黨公子鉏送之有賂田

○晉邢侯與雍子爭鄙田久而無成士景伯如楚叔魚攝理韓宣子命斷舊獄罪在雍子雍子納其女於叔魚叔魚蔽罪邢侯邢侯怒殺叔魚與雍子於朝宣子問其罪於叔向叔向曰三人同罪施生戮死可也雍子自知其罪而賂以買直鮒也鬻獄邢侯專殺其罪一也己惡而掠美爲昏貪以敗官爲墨殺人不忌爲賊夏書曰昏墨賊殺臯陶之刑也請從之乃施邢侯而尸雍子與叔魚

於市仲尼曰叔向古之遺直也治國制刑不隱於親三  
數叔魚之惡不爲末減曰義也夫可謂直矣平丘之會  
數其賄也以寬衛國晉不爲暴歸魯季孫稱其詐也以  
寬魯國晉不爲虐邢侯之獄言其貪也以正刑書晉不  
爲煩三言而除三惡加三利殺親益榮猶義也夫

十有五年

甲戌曹平  
公須九年

春王正月吳子夷末卒

末公羊作  
昧○吳世

家曰餘昧卒欲授弟季札札讓  
遜去乃立餘昧之子僚爲王

二月癸酉有事于武宮籥入叔弓卒去樂卒事

十五年春將禘于武公戒百官梓慎曰禘之日其有咎  
乎吾見赤黑之祲非祭祥也喪氛也其在洩事乎二月  
癸酉禘叔弓洩事籥入而卒去樂卒事禮也

夏蔡朝吳出奔鄭

公羊作昭  
吳無出字

楚費無極害朝吳之在蔡也欲去之乃謂之曰王唯信子故處子於蔡子亦長矣而在下位辱必求之吾助子請又謂其上之人曰王唯信吳故處諸蔡二三子莫之如也而在其上不亦難乎弗圖必及於難夏蔡人逐朝吳朝吳出奔鄭王怒曰余唯信吳故寘諸蔡且微吳吾不及此女何故去之無極對曰臣豈不欲吳然而前知其爲人之異也吳在蔡蔡必速飛去吳所以翦其翼也六月丁巳朔日有食之

○六月乙丑王太子壽卒○秋八月戊寅王穆后崩

秋晉荀吳帥師伐鮮虞

晉荀吳帥師伐鮮虞圍鼓鼓人或請以城叛穆子弗許左右曰師徒不勤而可以獲城何故不爲穆子曰吾聞

諸叔向曰好惡不愆民知所適事無不濟或以吾城叛  
吾所甚惡也人以城來吾獨何好焉賞所甚惡若所好  
何若其弗賞是失信也何以庇民力能則進否則退量  
力而行吾不可以欲城而邇姦所喪滋多使鼓人殺叛  
人而繕守備圍鼓三月鼓人或請降使其民見曰猶有  
食色姑脩而城軍吏曰獲城而弗取勤民而頓兵何以  
事君穆子曰吾以事君也獲一邑而教民怠將焉用邑  
邑以賈怠不如完舊賈怠無卒棄舊不祥鼓人能事其  
君我亦能事吾君率義不爽好惡不愆城可獲而民知  
義所有死命而無二心不亦可乎鼓人告食竭力盡而  
後取之克鼓而反不戮一人以鼓子戴鞮歸

國語曰中  
行伯既克

鼓以鼓子宛支來令鼓人各復其所非寮弗從鼓子之  
臣曰風沙釐以其擊行軍吏執之辭曰我君是事非事

土也名曰君臣豈曰土臣今君實遷臣何賴於鼓穆子召之曰鼓有君矣爾止事君吾定而祿爵對曰臣委質於翟之鼓未委質於晉之鼓也乃使行既獻言於頃公與鼓子田於河陰使夙沙釐相之

### 冬公如晉

冬公如晉平丘之會故也

○十二月晉荀躒如周葬穆后籍談爲介既葬除喪以文

伯荀躒宴樽以魯壺王曰伯氏諸侯皆有以鎮撫王室晉

獨無有何也文伯揖籍談對曰諸侯之封也皆受明器

於王室以鎮撫其社稷故能薦彝器於王晉居深山戎

狄之與鄰而遠於王室王靈不及拜戎不暇其何以獻

器王曰叔氏而忘諸乎叔父唐叔成王之母弟也其反

無分乎密須之鼓與其大路文所以大蒐也闕鞏之甲

武所以克商也唐叔受之以處參虛匡有戎狄其後襄

之一路鉞鉞和鬯彤弓虎賁文公受之以有南陽之田  
撫征東夏非分而向夫有勲而不廢有績而載奉之以  
土田撫之以彝器旌之以車服明之以文章子孫不忘  
所謂福也福祚之不登叔父焉在且昔而高祖孫伯騭  
司晉之典籍以爲大政故曰籍氏及辛有之二子董之  
晉於是乎有董史女司典之後也何故忘之籍談不能  
對賓出王曰籍父其無後乎數典而忘其祖籍談歸以  
告叔向叔向曰王其不終乎吾聞之所樂必卒焉今王  
樂憂若卒以憂不可謂終王一歲而有三年之喪二焉  
於是乎以喪賓宴又求彝器樂憂甚矣且非禮也彝器  
之來嘉功之由非由喪也三年之喪雖貴遂服禮也王  
雖弗遂宴樂以早亦非禮也禮王之大經也一動而失

二禮無大經矣言以考典典以志經忘經而多言舉典將焉用之

十有六年

乙亥○吳  
魯元年

○十六年春王正月公在晉晉人止公不書諱之也

春齊侯伐徐

齊侯伐徐二月丙申齊師至于蒲隧徐人行成徐子及邾人莒人會齊侯盟于蒲隧賂以甲父之鼎叔孫昭子曰諸侯之無伯害哉齊君之無道也國師而伐遠方會之有成而還莫之亢也無伯也夫詩曰周宗既滅靡所止戾正大夫鮒君莫知我肄其是之謂乎

楚子誘戎蠻子殺之

蠻公羊  
作曼

楚子間蠻氏之亂也與蠻子之無質也使然丹誘戎蠻

子嘉殺之遂取蠻氏既而復立其子焉禮也

傳在齊侯伐徐之下

○三月晉韓起聘于鄭鄭伯享之子產戒曰苟有位於朝無有不其恪孔張後至立於客間執政禦之適客後又禦之適縣閒客從而笑之事畢富子諫曰夫大國之人不可不慎也幾爲之笑而不陵我我皆有禮夫猶鄙我國而無禮何以求榮孔張失位吾子之恥也子產怒曰發命之不衷出令之不信刑之頗類獄之放紛會朝之不做使命之不聽取陵於大國罷民而無功罪及而弗知僞之恥也孔張君之昆孫子孔之後也執政之嗣也爲嗣大夫承命以使周於諸侯國人所尊諸侯所知立於朝而祀於家有祿於國有賦於軍喪祭有職受賑歸賑其祭在廟己有著位在位數世世守其業而忘其所



僑焉得恥之辟邪之人而皆及執政是先王無刑罰也  
子寧以他規我○宣子有環其一在鄭商宣子謁諸鄭  
伯子產弗與曰非官府之守器也寡君不知子大叔子  
羽謂子產曰韓子亦無幾求晉國亦未可以貳晉國韓  
子不可偷也若屬有讒人交鬪其閒鬼神而助之以興  
其凶怒悔之何及吾子何愛於一環其以取憎於大國  
也盍求而與之子產曰吾非偷晉而有二心將終事之  
是以弗與忠信故也僑聞君子非無賄之難立而無令  
名之患僑聞爲國非不能事大字小之難無禮以定其  
位之患夫大國之人介於小國而皆獲其求將何以給  
之一其一否爲罪滋大大國之求無禮以斥之何饜之  
有吾且爲鄙邑則失位矣若韓子奉命以使而求玉焉

貪淫甚矣獨非罪乎出一玉而起二罪吾又失位韓子  
成貪將焉用之且吾以玉賈罪不亦銳乎韓子買諸賈  
人既成賈矣商人曰必害君大夫韓子請諸子產曰日  
起請夫環執政弗義弗敢復也今買諸商人商人曰必  
以聞敢以爲請子產對曰昔我先君桓公與商人皆出  
自周庸次比耦以艾殺此地斬之蓬蒿藜藿而共處之  
世有盟誓以相信也曰爾無我叛我無強買無或勾奪  
爾有利市寶財我勿與知恃此質誓故能相保以至于  
今今吾子以好來辱而謂敝邑強奪商人是教敝邑背  
盟誓也毋乃不可乎吾子得玉而失諸侯必不爲也若  
大國令而其無藝鄭鄙邑也亦弗爲也僑若獻玉不知  
所成敢私布之韓子辭玉曰起不敏敢求玉以徼二罪

敢辭之○夏四月鄭六卿餞宣子於郊宣子曰二三君子請皆賦起亦以知鄭志子奮賦野有蔓草宣子曰孺子善哉吾有望矣子產賦鄭之羔裘宣子曰起不堪也子大叔賦褰裳宣子曰起在此敢勤子至於他人乎子大叔拜宣子曰善哉子之言是不有是事其能終乎子游賦風雨子旗賦有女同車子柳賦稗兮宣子喜曰鄭其庶乎二三君子以君命祝起賦不出鄭志皆昵燕好也二三君子數世之主也可以無懼矣宣子皆獻馬焉而賦我將子產拜使五卿皆拜曰吾子靖亂敢不拜德宣子私覲於子產以玉與馬曰子命起舍夫玉是賜我玉而免吾死也敢不藉手以拜

夏公至自晉

公至自晉子服昭伯請季平子曰晉之公室其將遂卑矣君幼弱六卿彊而奢傲將因是以習習實爲常能無卑乎平子曰爾幼惡識國

秋八月己亥晉侯夷卒

秋八月晉昭公卒

九月大雩

九月大雩旱也

○鄭大旱使屠擊祝款豎柎有事於桑山斬其木不雨子產曰有事於山藝山林也而斬其木其罪大矣奪之官邑

季孫意如如晉冬十月葬晉昭公

冬十月季平子如晉葬昭公平子曰子服回之言猶信

子服氏有子哉

十有七年

丙子○晉頃公去疾元年

春小邾子來朝

十七年春小邾穆公來朝公與之燕季平子賦采叔穆公賦菁菁者莪昭子曰不有以國其能久乎

夏六月甲戌朔日有食之

夏六月甲戌朔日有食之祝史請所用幣昭子曰日有食之天子不舉伐鼓於社諸侯用幣於社伐鼓於朝禮也平子禦之曰止也唯正月朔慝未作日有食之於是乎有伐鼓用幣禮也其餘則否大史曰在此月也日過分而未至三辰有災於是乎百官降物君不舉辟移時樂奏鼓祝用幣史用辭故夏書曰辰不集于房瞽奏鼓雷大馳庶人走此月朔之謂也當夏四月謂之孟夏平

子弗從昭子退曰夫子將有異志不君君矣

秋鄰子來朝

秋鄰子來朝公與之宴昭子問焉曰少皞氏鳥名官何故也鄰子曰吾祖也我知之昔者黃帝氏以雲紀故爲雲師而雲名炎帝氏以火紀故爲火師而火名共工氏以水紀故爲水師而水名大皞氏以龍紀故爲龍師而龍名我高祖少皞摯之立也鳳鳥適至故紀於鳥爲鳥師而鳥名鳳鳥氏歷正也立鳥氏司分者也伯趙氏司至者也青鳥氏司啓者也丹鳥氏司閉者也祝鳩氏司徒也鳴鳩氏司馬也鳴鳩氏司空也爽鳩氏司寇也鵲鳩氏司事也五鳩鳩民者也五雉爲五工正利器用正度量夷民者也九扈爲九農正扈民無淫者也自顓頊

以來不能紀遠乃紀於近爲民師而命以民事則不能故也仲尼聞之見於鄴子而學之旣而告人曰吾聞之天子失官學在四夷猶信

八月晉荀吳帥師滅陸渾之戎

公穀並無之字陸公羊作賁

晉侯使屠蒯如周請有事於雒與三塗萇弘謂劉子曰客容猛非祭也其伐戎乎陸渾氏甚睦於楚必是故也君其備之乃警戎備九月丁卯晉荀吳帥師涉自棘津使祭史先用牲于雒陸渾人弗知師從之庚午遂滅陸渾數之以其貳於楚也陸渾子奔楚其衆奔甘鹿周大獲宣子夢文公攜荀吳而授之陸渾故使穆子帥師獻俘于文宮

冬有星孛于大辰

公羊曰何以書此異也

冬有星孛于大辰西及漢中須曰彗所以除舊布新也  
天事恆象今除於火火出必布焉諸侯其有火災乎梓  
慎曰往年吾見之是其徵也火出而見今茲火出而章  
必火入而伏其居火也久矣其與不然乎火出於夏爲  
三月於商爲四月於周爲五月夏數得天若火作其四  
國當之在宋衛陳鄭乎宋大辰之虛也陳大皞之虛也  
鄭祝融之虛也皆火房也星孛及漢漢水祥也衛顛頊  
之虛也故爲帝亡其星爲大水水火之壯也其以丙子  
若壬午作乎水火所以合也若火入而伏必以壬午不  
過其見之月鄭裨竈言於子產曰宋衛陳鄭將同曰火  
若我用瓊尊玉瓚鄭必不火子產弗與

楚人及吳戰于長岸

公羊曰詐戰不言戰此其言戰何敵也穀梁曰兩夷狄曰敗進楚子故曰



吳伐楚陽句爲令尹卜戰不吉司馬子魚曰我得上流何故不吉且楚故司馬令龜我請改卜令曰魴也以其屬死之楚師繼之尙大克之吉戰于長岸子魚先死楚師繼之大敗吳師獲其乘舟餘皇使隨人與後至者守之環而塹之及泉盈其隧炭陳以待命吳公子光請於其衆曰喪先王之乘舟豈唯光之罪衆亦有焉請藉取之以救死衆許之使長鬣者三人潛伏於舟側曰我呼餘皇則對師夜從之三呼皆迭對楚人從而殺之楚師亂吳人大敗之取餘皇以歸